

## 1-§. Umumiy qoidalar

1. Mazkur BHMSning maqsadi qayta tashkil etishni amalga oshirish haqidagi axborotni moliyaviy hisobotda yoritish tartibini belgilash hisoblanadi.

2. Mazkur BHMS O‘zbekiston Respublikasi hududidagi barcha tashkilotlarga (byudjet tashkilotlari, xususiylashtirilgan investisiya fondlari, banklar va boshqa kredit tashkilotlaridan tashqari) (keyingi o‘rinlarda — korxonalar) tatbiq etiladi.

3. Mazkur BHMS davlat unitar korxonalarini xususiylashtirish bilan bog‘liq xo‘jalik operatsiyalariga nisbatan qo‘llanmaydi.

4. Korxonani qayta tashkil etish uning ta’sischilari (ishtirokchilari) yoki ta’sis hujjatlarida shunga vakil qilingan yuridik shaxs organining qaroriga muvofiq quyidagi shakllarda amalga oshirilishi mumkin:

- a) qo‘shib yuborish;
- b) qo‘shib olish;
- v) bo‘lish;
- g) ajratib chiqarish;
- d) o‘zgartirish.

5. Mazkur BHMSda qo‘llanuvchi atamalar:

a) qo‘shib yuborish — o‘z faoliyatlarini tugatish orqali ikki yoki bir nechta korxonalarning barcha huquqlari va majburiyatlarini bergan holda yangi korxonani vujudga keltirilishi;

b) qo‘shib olish — bir yoki bir nechta korxona faoliyatini to‘xtatib, ularning huquqlari va majburiyatlarini boshqa korxonaga berish;

v) bo‘lish — korxona faoliyatini to‘xtatib, uning huquqlari va majburiyatlarini yangi tuzilayotgan korxonalarga berish;

g) ajratib chiqarish — korxonalarning huquq va majburiyatlari bir qismini unga berish yo‘li bilan yangi korxonani vujudga keltirish;

d) o‘zgartirish — yangi vujudga kelgan yuridik shaxsga qayta tashkil etilgan yuridik shaxsning barcha huquqlari va majburiyatlarini berish yo‘li bilan korxonaning tashkiliy-huquqiy shaklini o‘zgartirish;

ye) qayta tashkil etilayotgan korxonalarning joriy faoliyati bilan bog‘liq operasiyalar — tovar-moddiy qiymatliklarni sotish, kreditorlar bilan hisob-kitob qilish, topshirilayotgan mulk bo‘yicha amortizasiyani hisoblash, xodimlarga mehnat haqini hisoblash, tegishli byudjetlar bilan soliqlar, yig‘imlar va to‘lovlar bo‘yicha hamda davlat maqsadli jamg‘armalariga majburiy to‘lovlar bo‘yicha hisob-kitoblarni amalga oshirish, topshirish dalolatnomasiga kiritilishi lozim bo‘lmagan kelgusi davr xarajatlarini, masalan, huquqlari huquqiy vorislik tartibida berilishi mumkin bo‘lmagan faoliyatni amalga oshirish uchun lisenziya olish xarajatlarini va boshqa shunga o‘xshagan xarajatlarni hisobdan chiqarish;

j) aksiyalarni konvertasiya qilish — buning natijasida bir yoki bir nechta aksiyadorlik jamiyati tashkil topadigan qayta tashkil etishda bir aksiyadorlik jamiyatining aksiyalarini boshqa aksiyadorlik jamiyati (aksiyadorlik jamiyatlari)ning aksiyalariga yoki boshqa xo‘jalik yurituvchi sub’yektlarning ulushlari (paylari)ga ayirboshlash operatsiyasi;

z) ayirboshlash — buning natijasida boshqa tashkiliy-huquqiy shakldagi korxona (aksiyadorlik jamiyatidan tashqari) tashkil topadigan qayta tashkil etishda bir yoki bir nechta aksiyadorlik jamiyatining aksiyalari, korxonalarining ulushlari (paylari)ni boshqa korxonalarining ulushlari (paylari)ga ayirboshlash operatsiyasi.

6. Korxonalarni qayta tashkil etish haqidagi axborotning moliyaviy hisobotda yoritish quyidagilarga asosan amalga oshiriladi:

a) O‘zbekiston Respublikasining [Fuqarolik kodeksiga](#) muvofiq korxonalarni bo‘lish yoki ularning tarkibidan bir yoxud bir nechta korxonani ajratib chiqarish shaklida korxonalarni qayta tashkil etishda korxonaning ta’sischilari (ishtirokchilari) yoki ta’sis hujjatlarida shunga vakil qilingan yuridik shaxs organi yoki vakolatli davlat organlarining (keyingi o‘rinlarda — ta’sischilar) qaroriga yoxud qonunda belgilangan hollarda sud qaroriga asosan;

b) qonun hujjatlarida belgilangan hollarda korxonalarni qo‘shib yuborish, qo‘shib olish yoki o‘zgartirish shaklida qaytadan tashkil etishda vakolatli davlat organlarining roziligiga asosan.

7. Korxonalarni qayta tashkil etish haqidagi axborotni moliyaviy hisobotda shakllantirish uchun ta’sischilar qarorida quyidagilar nazarda tutilishi mumkin:

a) aktivlar va majburiyatlarni inventarizasiya qilish muddatlari;

b) huquqiy vorislik tartibida topshiriluvchi (qabul qilinuvchi) aktivlar va majburiyatlarni baholash usuli;

v) topshirish dalolatnomasi yoki taqsimlash balansi tasdiqlanganidan keyin qayta tashkil etilayotgan

korxonaning joriy faoliyati natijasida yuzaga kelishi mumkin bo'lgan aktivlar va majburiyatlarning o'zgarishi munosabati bilan huquqiy vorislik tartibi, shuningdek muayyan xo'jalik operatsiyalarini amalga oshirish (kreditlar va qarzlar olish yoki berish, investisiyalarni amalga oshirish va b.)ning alohida tartibi;

g) yangi vujudga kelgan yoki qayta tashkil etilayotgan korxonalarning ta'sis hujjatlarida aks ettirish uchun ustav kapitalini shakllantirish tartibi va uning miqdori;

d) aksiyadorlardan aksiyalarni sotib olishga (xarid qilishga) yo'naltirish zaruriyati yuzaga kelishi mumkinligini hisobga olgan holda, qayta tashkil etilayotgan korxona hisobot davrida va o'tgan yillarda olgan sof foydani yo'naltirish (taqsimlash), shartli va kafolatlangan majburiyatlarni hisobdan chiqarish (oqibatlarni baholagan holda tan olish) va b.